

Inissialionermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi kapitali 4-ip allanngortinneqarnissaanik Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut, taamaaliornikkut illuutit ataasiakkaat niuernerminaleqassusaannut naleqqussaasoqarnissaa qulakkeerneqarsinnaaqqullugu.

(Inatsisartunut ilaasortat Knud Kristiansen og Gerhardt Petersen, Atassut)

Akissuteqaat

(Ineqarnermut Naalakkersuisoq)

Aappassaanneerpeqarnera

Siunnersuut Inatsisartut Sanaartornermut Ataatsimiititaliaanit suliarineqarpoq.

Ataatsimiititaliap isumaliutissiissutaani ilaatigut allassimavoq, ”Suliap suliarineqarnera qanorluunniit ineqassagaluarpat, ineqarnermut tunngasut tamaasa, tamatumannittaag ineqarnermut tapiissuteqartarneq ilanngullugu misissorlugit sulineq Naalakkersuisut ingerlatiinnarniaraat Ataatsimiititaliap paasimmagu, siunnersuut una itigartinneqassasoq Ataatsimiititaliaq inassuteqarpoq.

Ataatsimiititaliaq aamma kaammattuuteqarpoq, misissuinernut ingerlanneqartunut atatillugu aamma pisortat inissiaataanni attartorluni, Illut A/S-imi tapiiffigineqarluni namminerisamik illuummi aamma piginneqatigiilluni illuummi nammineq pigisami kiisalu namminerisamik illuummi ileqqussumik taarsigassarseriaatsit atorlugit pissarsiarineqarsimasumi ineqarnermi ataatsimut akiliutigisartakkat qanoq ittuunerat pillugu assersuusiorluni takussutissiorloqassasoq.”

Tamanna tunngavigalugu ataatsimiititaliap isumaqatigiittup inassutigaa, siunnersuut Inatsisartuni itigartinneqassasoq.

Ataatsimiititaliap isummersuutai Naalakkersuisunit tusaatissatut tiguneqarput, aammalu ineqarnermik iluarsartuusseqqinnerup ingerlaqqinnissaanut ilaatinniarlugit.

Taamatut oqaaseqarlunga siunnersuut Inatsisartuni suliarineqartussanngorlugu tunniuppara.